

Boletín Nº 190. Sábado, 19 de agosto de 2000

- [III. ADMINISTRACIÓN LOCAL](#) - [III.2 MUNICIPAL](#) - [CULLEREDO](#)

ANUNCIO Pág. 7603 Reg. 9019-PD / 9037.

[Anterior](#)

[Siguiente](#)

Regulamento para as unións de feito

O Pleno do Concello de Culleredo, en sesión ordinaria celebrada o día 26 de xullo do ano 2000 adoptou, entre outros acordos, o de aprobar definitivamente o Regulamento do rexistro municipal de unións de feito que se transcribe de seguido:

Regulamento do rexistro municipal de unións de feito do Concello de Culleredo

Exposición de motivos

Considerando a inquietude social que xurdiu ultimamente con respecto de que as parellas de feito vexan garantido o seu dereito á non discriminación social en base ó que establece o artigo 14 da Constitución.

Considerando que o libre desenvolvemento da personalidade e a igualdade ante a lei, que constitúen principios fundamentais do ordenamento xurídico e social, demandan de tódolos poderes públicos a promoción de condicións para que esta liberdade e igualdade dos cidadáns e dos grupos nos que se integran sexan reais e efectivas, debendo elimina-los obstáculos que impidan ou dificulten a súa plenitude.

Considerando que calquera home ou muller, no libre e lexítimo exercicio da súa autonomía persoal, ten dereito a constituír por medio dunha unión efectiva estable unha comunidade de vida que, completada ou non con fillos, dea lugar á creación dunha familia, a protección social, económica e xurídica da cal deberá ser garantida polos poderes públicos.

Considerando que o matrimonio é a forma institucionalizada na que historicamente se ten manifestado esta unión efectiva de xeito moi plural e que existen moitas parellas que se atopan, ou se ven obrigadas, para establece-la súa comunidade permanente de vida, é dicir, para crea-la súa familia, a estar á marxe do matrimonio, sen que por iso teñan que estimarse de peor calidade humana ou social as súas relacións persoais ou de menor entidade xurídica as súas obrigas paternofiliais.

Considerando que estas parellas que constitúen unións non matrimoniais deberían aproveitar da mesma protección social, económica e xurídica cás unións matrimoniais e as familias por elas orixinadas, para garanti-lo respecto e a promoción dos citados principios fundamentais de libre desenvolvemento da personalidade e de igualdade entre os cidadáns.

Considerando que na evolución actual da sociedade, a convivencia preséntase como unha realidade que non pode dar lugar nin á desigualdade nin atentar contra a dignidade da persoa, esta protección constitucional estenderase, polos mesmos fundamentos, ás unións estables e afectivas constituídas por parellas, fundamentalmente homosexuais, unha vez superadas as obxeccións morais que as

teñen estado a marxinar, e incluso a criminalizar, e manténdoas absolutamente ignoradas no ordenamento xurídico.

Considerando que o Parlamento Europeo recomendou o fin das discriminacións por mor da orientación sexual e a equiparación de dereitos das parellas homosexuais ó matrimonio.

Considerando que a existencia constitucional de igualdade e liberdade está dirixida a tódolos poderes públicos e por iso, en tanto non se promulguen as disposicións legais pertinentes, e sen prexuízo da aplicación analóxica ou dunha interpretación xudicial adecuada á realidade social dos nosos tempos, semella procedente ofrecer, incluso no reducido ámbito da administración local, un instrumento xurídico que favoreza a igualdade e garanta a protección social, económica, e xurídica das familias constituídas por medio de unións non matrimoniais, con independencia da orientación sexual.

Por isto, coa finalidade de que poida quedar constancia no ámbito da Administración municipal, tanto a efectos de inscrición no padrón municipal de habitantes, como no resto de asuntos ou servicios a cargo do noso Concello, sen prexuízo doutras finalidades que se puidesen considerar lexítimas e sen que en ningún caso isto poida representar alteración ou intromisión nas competencias que poidan corresponder a outros organismos, como é o recoñecemento doutras formas de proba de existencia de parella coma as actas notariais de convivencia, apróbase o presente regulamento.

Artigo 1.

Créase no Concello de Culleredo un Rexistro Municipal de Unións Cívís, de carácter administrativo, onde se poidan inscribir, de xeito totalmente voluntario, as parellas que convivan sen estaren casadas, con independencia da súa orientación sexual.

Artigo 2.

Inscribiranse as declaración de unións non matrimoniais entre parellas, con independencia da orientación sexual, solicitadas en instancia subscrita polos dous membros da unión, e trala declaración formal respecto da existencia da unión realizada en comparecencia persoal e conxunta perante a Secretaría Xeral do Concello.

A solicitude e a declaración formalizaranse en modelos normalizados que figuran como anexo ó presente regulamento.

Artigo 3.

Establécense como requisitos mínimos para a inscrición no Rexistro:

Ser maiores de idade ou menores emancipados, acreditándoo coa fotocopia do DNI ou documentos acreditativos da emancipación, de conformidade co establecido no art. 314 e ss. do Código civil.

Non ter sido declarados incapacitados ou estar incurso nas prohibicións recollidas nos arts. 46 e 47 do Código civil, achegando declaración responsable para tal efecto.

Estar empadroados no Concello de Culleredo. Para tal efecto, formulada a solicitude de inscrición, pola funcionaria responsable do padrón municipal, expedirase informe ó respecto.

Tamén poderanse inscribir, mediante transcripción literal, os contratos reguladores das relacións persoais ou patrimoniais entre os membros destas unións.

Así mesmo, e dentro da legalidade, poderanse inscribir outros feitos ou circunstancias relevantes que afecten á unión non matrimonial.

Artigo 4.

A vixencia da inscrición no Rexistro Municipal de Unións Cívís, será de tres anos.

A inscrición poderá renovarse, polo mesmo prazo, se as partes o formalizan, antes da finalización da vixencia da inscrición inicial, en solicitude de renovación asinada conxuntamente polas partes e tras efectuar declaración perante a Secretaría Xeral do Concello de que se manteñen as mesmas circunstancias que concorrían no momento da inscrición primeira.

Para tal efecto inclúese como anexo ó presente regulamento modelos normalizados de solicitude de renovación e da declaración conseguinte.

Transcorrido o prazo de tres anos sen efectuarse solicitude de renovación, a inscrición no Rexistro quedará automaticamente cancelada.

Artigo 5.

Calquera modificación posterior dos datos inscritos en canto ó convenio e feitos ou circunstancias, deberase efectuar mediante comparecencia persoal e conxunta dos membros da unión de convivencia non matrimonial.

Artigo 6.

A extinción da unión civil poderá ser polos seguintes motivos:

Transcorrido o prazo de tres anos de vixencia sen renovación por ámbalas dúas partes.

A instancia dun só dos seus membros, sendo necesario para a disolución efectiva demostrar que o feito está en coñecemento das dúas partes, ou exclusivamente da parte que propón a disolución de estar demostrado o abandono efectivo da convivencia coa parella, a través de documentos que así o acrediten (baixa no padrón de habitantes, cambio de enderezo ou acta notarial).

Artigo 7.

O Rexistro de Unións Cívís do Concello de Culleredo estará ó cargo da Secretaría Xeral do Concello e co fin de garanti-la intimidade persoal e familiar dos inscritos no Rexistro, non se lle dará publicidade algunha ó contido dos asentos, salvo as certificacións que expida a Secretaría Xeral do Concello a instancia exclusivamente da calquera dos membros da unión de feito interesados ou dos xuíces e tribunais de xustiza.

Artigo 8.

O Rexistro materializarase nun libro xeral, no que se practicarán as inscricións das unións cívís do Concello de Culleredo. Este libro estará formado por follas móbiles, foliadas e seladas, e encabezarase e terminará coas correspondentes dilixencias de apertura e cerre.

Artigo 9.

A primeira inscrición de cada parella terá o carácter de inscrición básica e á marxe da mesma anotarase todo outro asento que se produza con posterioridade no libro xeral principal relativo a cada unión.

Artigo 10.

O Rexistro terá tamén un libro auxiliar ordenado por apelidos dos inscritos ou inscritas no que se expresará o número das páxinas do libro xeral nas que existan anotacións que lles afecten.

Artigo 11.


As inscricións serán gratuítas así como as modificacións, renovacións e as baixas.


Disposición adicional 1.ª:


O Rexistro municipal de Unións Cívís do Concello de Culleredo entrará en vigor o día seguinte da súa publicación no Boletín oficial da Provincia.

Culleredo, 27 de xullo de 2000.

O alcalde, Julio Sacristán de Diego.

 [Grande \(56Kb\)](#)
[Pequeña \(20Kb\)](#)

 [Grande \(52Kb\)](#)
[Pequeña \(20Kb\)](#)

 [Grande \(80Kb\)](#)
[Pequeña \(28Kb\)](#)

 [Grande \(44Kb\)](#)
[Pequeña \(16Kb\)](#)

 [Grande \(64Kb\)](#)
[Pequeña \(20Kb\)](#)

 [Grande \(64Kb\)](#)
[Pequeña \(20Kb\)](#)

 [Grande \(64Kb\)](#)
[Pequeña \(20Kb\)](#)

[Grande \(44Kb\)](#)
[Pequeña \(16Kb\)](#)

[Grande \(64Kb\)](#)
[Pequeña \(20Kb\)](#)

Reg. 9019-PD / 9037

